

Matumuuna Inatsisartut Suleriaasissaanni § 33, imm. 6, nr. 4 naapertorlugu aalajangiussassatut siunnersuut manna Naalakkersuisut saqqummiuppaat:

Uunga siunnersuut: Suliniutit annertuut sanaartornerisa nalaanni nunanit allamiut najugaqalernissamut sulinissamullu akuerineqarsinnaanerat pillugu Kalaallit Nunaannut Inatsisip Kalaallit Nunaannut atuutilernissaa pillugu oqaaseqaateqarnissamut Inatsisartut aalajangiinissaanut siunnersuut
(Inuussutissarsiornermut Aatsitassaqaqarnermullu Naalakkersuisoq)

Tungavigisaq

Aalajangiinissamut siunnersuut tassaavoq suliniutit annertuut sanaartornerisa nalaanni nunanit allamiut najugaqarnissamut sulinissamullu akuerineqarsinnaanerat pillugu Kalaallit Nunaanni inatsit pillugu inatsisissatut siunnersuummut Namminersorlutik Oqartussat oqaaseqaataat.

Inatsisissatut siunnersuutip siunertaa tassaavoq Suliniutini angisuuni illuliortiternernik sanaartornernillu suliassat pillugit Inatsisartut inatsisaat nr. 25, 18. december 2012-imeersup, Inatsisartut inatsisaat nr. 13, 29. november 2013-imeersukkut allangortinneqartup (suliniutinut angisuunut inatsisip) malitsigisaatut suliniutit angisuut sanaartorfiunerisa nalaanni nunanit allanit sulisartut najugaqarnissamut sulinissamullu akuersissummik nalunaaruteqarfigineqarsinnaanissaannik periarfissiinissaq. Taamaalilluni suliniutinut angisuunut inatsisip malitsigisaatut inatsisissatut siunnersuut saqqummiunneqarpoq.

Nunanit allamiunik killeqarfinnillu nakkutilliinerit, ilanngullugit najugaqalernissamut sulinissamullu akuersissutit pillugit malittarisassiat tassaapput suliassaqarfiit Namminersorlutik Oqartussat suli tigusimannngisaat, taamaattumillu naalagaaffiup ataaniittuullutik.

Inatsisissatut siunnersuutip imarisai

Inatsisissatut siunnersuutikkut Kalaallit Nunaannut atuuttussanngorlugu nunanit allamiunut inatsisaasumut atuuttunut naleqqiullugit allanik piumasqaateqarluni suliniutini angisuuni sanaartornerit nalaannut atatillugu nunanit allanit sulisartut Kalaallit Nunaanni najugaqarnissamut sulinissamullu akuersissuteqarnermik nalunaaruteqarfigilersinnaallugit immikkut ittumik najoqqutassiamik pilersitsisoqarpoq.

Inatsisissatut siunnersuummi oqaaseqaatini nalinginnarni allassimavoq naalagaaffiup paasinninnera naapertorlugu aatsitassanik qaqutigoortunik paaallunilu avammut tunisaqarneq nunanut allanut, illersornissamut imaluunniit naalagaaffiup isumannaatsuunissanut politikikkut ilusilinnik apeqqutinik saqqummiussiffiusinnaaneri pinaveerneqarsinnaassanngitsut. Tamanna tunngavigalugu suliniutinut angisuunut aatsitassanut qaqutigoortunut tunngasunut, ilanngullugu saniatigooralugu tunisassiaasunut atatillugu siunnersuummi § 1, imm. 1-imi aalajangersagassatut siunnersuut malillugu najugaqarsinnaanermut sulisinnaanermullu akuersissutigisap nalunaarutiginnera aatsaat taamatut suliniutit pillugit illua'tungeriilluni paasissutissanik paarlaateqatigiinnissaq pillugu Naalakkersuisut aamma naalagaaffiup akornanni isumaqatigiittoqareerneratigut pisinnaassaaq.

Aammattaaq inatsisissatut siunnersuummi allassimavoq pissutsit taakku aatsitassanik suliassaqarfimmi, namminersorlutik oqartussat inatsisiliornermik inatsisinillu atuutsitsinermik pissaaneqarfigisaanni namminersorlutik oqartussat aamma naalagaaffimmi oqartussat akornanni piginnaasaqarfittut agguataarnermik atuuttumik allannguisuunngitsut.

Siunnersuut pillugu naalagaaffiup aamma Naalakkersuisut akornanni qanimut oqaloqateqartoqarsimavoq, ilanngullugu aatsitassat qaqutigoortut pillugit apeqqummut tunngatillugu. Oqaloqatigiinnikkut tassuuna maannakkut Folketingimi ataatsimiinnermi inatsisissatut siunnersuutip saqqummiunnissaa pillugu Naalakkersuisut kissaatigisaata akuersaartinnissaa iluatsissimavoq.

Suliniutitut angisuunut inatsisip siunertaraa Kalaallit Nunaanni aningaasaliinerit siuarsarnissaat, aammalu Kalaallit Nunaata aningaasaqarnikkut ineriartorneranut immikkut pingaarutilinnik suliniutinik angisuunik ingerlatsisoqarnissap periarfissalernissaa. Taamaattumik inatsisissatut siunnersuummik Folketingip akuersissuteqarneratigut suliniutitut angisuunut inatsisiliornerup naggatigisaata inissinneqarnissaa Naalakkersuisut assorsuaq pingaartippaat.

Nunanit allanit aningaasaliisartunik aggersaasinnaasunik sinaakktissatut piunasaqaatit pilersinnissaat pillugit Naalakkersuisut aamma naalagaaffiup isumaqatigiissuteqarnerannik inatsisissatut siunnersuutip akuersissutiginera nunarsuarmut avatangiisumut nalunaarutaassaaq. Kalaallit Nunaannut suliffiit nutaat isertitallu pillugit kissaatigisamik naapitsiniarluni anguniagaqarluta suliaqarnerput pillugu innuttaasunut tamanna erseqqissumik nalunaarutaassaaq.

Tusarniaaneq

Inatsisissatut siunnersuut namminersorlutik oqartussat naalakkersuisoqarfiini, KANUKOKA-mi, suliffeqarfimmi illua'tungerisani, ICC-mi aamma Transparency Greenlandimi tusarniaassutaasimavoq. Tusarniaaneq allannguuteqartitsinissamut tunngavissiisimangilaq.

Siunnersuut Inatsisartuni akuersaartumik oqaluuserinissaanut Naalakkersuisut innersuussutigaat.